



SIARAN MEDIA

KEMENTERIAN PERALIHAN TENAGA DAN TRANSFORMASI AIR (PETRA)

MALAYSIA ZAHIR KOMITMEN TEGUH TERHADAP KESELAMATAN NEGARA

LONDON, 26 April 2025 – Sidang Kemuncak Mengenai Keselamatan Tenaga atau *Summit for the Future of Energy Security* melabuhkan tirainya semalam setelah berlangsung selama dua hari dengan kehadiran pemimpin-pemimpin utama dunia dalam sektor tenaga.

Malaysia telah menzahirkan komitmen teguh terhadap keselamatan tenaga dan peralihan tenaga yang adil serta berdaya tahan, sejajar dengan aspirasi global untuk mencapai masa depan tenaga yang bersih, mampan dan inklusif.

Delegasi Malaysia yang diketuai oleh YAB Dato' Sri Haji Fadillah bin Yusof, Timbalan Perdana Menteri merangkap Menteri Peralihan Tenaga dan Transformasi Air, telah mengambil bahagian secara aktif dalam perbincangan strategik yang melibatkan isu-isu utama seperti integrasi sistem tenaga serantau, daya tahan terhadap perubahan iklim, keselamatan bekalan elektrik serta penggunaan teknologi baharu.

Malaysia juga telah memanfaatkan sidang ini untuk:

- Memperkukuh kedudukan sebagai Pengerusi ASEAN 2025, menerajui usaha merealisasikan Grid Tenaga ASEAN;
- Mempromosikan pendekatan menyeluruh menerusi Pelan Hala Tuju Peralihan Tenaga Negara (NETR);
- Memperkasa kerjasama dua hala dalam sektor tenaga menerusi pertemuan dengan pemimpin UK dan Pengarah Eksekutif IEA.

YAB Timbalan Perdana Menteri menegaskan bahawa Malaysia komited untuk memimpin peralihan tenaga rantau ini secara pragmatik dan progresif, dengan memberi keutamaan kepada kebolehcapaian, keterjaminan bekalan dan kemampuan pengguna.

Penyertaan aktif Malaysia dalam *Summit for the Future of Energy Security* serta komitmen negara terhadap keselamatan dan peralihan tenaga yang adil dan berdaya tahan mencerminkan pelaksanaan prinsip Malaysia MADANI, khususnya nilai Kesejahteraan, Kemampanan, dan Keterangkuman. Pendekatan pragmatik dan berpaksikan rakyat dalam memimpin peralihan tenaga sejajar dengan aspirasi Malaysia MADANI untuk membentuk negara yang progresif, lestari dan inklusif, demi kesejahteraan generasi kini dan akan datang.

KEMENTERIAN PERALIHAN TENAGA DAN TRANSFORMASI AIR

26 APRIL 2025

Unit Komunikasi Korporat | Kementerian Peralihan Tenaga dan Transformasi Air (PETRA)
Tel.: 03-8000 8000 | E-Mel: ukk@petra.gov.my

